


蘋洲漁笛譜






叢書集成  
初編

王 雲 著  
王 雲 編  
王 雲 主

商務印書館發行

7043334



蘋洲漁笛譜

周密撰

本館據知不足齋  
叢書本排印初編  
各叢書僅有此本

踏莎行敬賦

草窗絕妙詞

夢函覺翁吳文英

楊柳風流。蕙花清潤。蘋口未數張三影。沈香口醉調清平。新辭口  
 口口口口。鮫室裁綃。口口口口。口口白雪爭歌郢。西湖同結杏  
 花盟。東風休賦丁香恨。



蘋洲漁笛譜卷一

宋 齊人周 密公謹父撰

減字木蘭慢

西湖十景尙矣。張成子嘗賦應天長十闕。誇余曰。是古今詞家未能道者。余時年少氣銳。謂此人間景。余與子皆人間人。子能道。余顧不能道耶。冥搜六日而詞成。成子驚賞敏妙。許放出一頭地。異時霞翁見之。曰。語麗矣。如律未協。何。遂相與訂正。閱數月而後定。是知詞不難作。而難於改。語不難工。而難於協。翁往矣。賞音寂然。姑述其槩。以寄余懷云。

蘇堤春曉

恰芳菲夢醒。漾殘月。轉湘簾。正翠崦收鐘。彤墀放仗。臺榭輕煙。東園。

夜游乍散。聽金壺逗曉。歇花籤。官柳微開露眼。小鶯寂妒春眠。冰  
匳。黛淺紅鮮。臨曉鑑。競晨妍。怕誤卻佳期。宿妝旋整。忙上雕鞍。都緣。  
探芳起早。看堤邊早有已開船。被帳殘香淚蠹。有人病酒慳慳。

平湖秋月

碧霄澄暮靄。引瓊駕。碾秋光。看翠闕風高。珠樓夜午。誰搗元霜。滄茫。  
玉田萬頃。趁仙查只赤接天潢。髮髯凌波步影。露濃珮冷衣涼。明  
璫。淨洗新妝。隨皓彩。過西廂。正霧衣香潤。雲鬟紺溼。私語相將。鴛鴦。  
誤驚夢曉。掠芙蓉度影入銀塘。十二闌干竚立。鳳簫怨徹清商。

斷橋殘雪

覓梅花信息。擁吟袖。莫鞭寒。自放鶴人歸。月香水影。詩冷孤山等閑。  
泮寒暝暖。看融城御水到人間。瓦隴竹根更好。柳邊小駐游鞍。  
琅玕。半倚雲灣。孤棹晚。載詩還。是醉魂醒處。畫橋第二。奩月初三。東

欄。有人步玉。怪冰泥沁溼錦鷓斑。還見晴波漲綠。謝池夢草相關。

雷峯落照

塔輪分斷雨。倒霞影。漾新晴。看滿鑑春紅。輕橈占岸。疊鼓收聲。簾旌半鉤待燕。料香濃徑遠。躑蜂程。芳陌人扶醉玉。路傍懶拾遺簪。郊垌未厭游情。雲暮合。漫銷凝。想罷歌停舞。煙花露柳。都付棲鶯。重闌已催鳳鑰。正鈿車繡勒入爭門。銀燭擎花夜暖。禁街淡月黃昏。

麴院風荷

軟塵飛不到。過微雨。錦機張。正蔭綠池幽。交枝徑窄。臨水追涼。官妝。蓋羅障暑。泛青蘋亂舞五雲裳。迷眼紅綃絳綵。翠深偷見鴛鴦。湖光兩岸瀟湘。風薦爽。扇搖香。算惱人偏是。縈絲露藕。連理秋房。涉江采芳舊恨。怕紅衣夜冷落橫塘。折得荷花忘卻。棹歌唱入斜陽。

花港觀漁



六橋春浪暖。漲桃雨。鰕初肥。正短棹輕蓑。牽篴荇帶。縈網蓴絲。依稀岸紅。翅遠。漾仙舟。誤入武陵溪。何處金刀。膾玉。畫船傍柳。頻催。芳堤。漸滿斜暉。舟葉亂。浪花飛。聽暮榔聲合。鷗沈暗渚。鷺起煙磯。忘機夜深浪靜。任煙寒自載。月明歸。三十六鱗。過卻。素牋不寄相思。

南屏晚鐘

疎鐘敲暝色。正遠樹。綠恹恹。看渡水僧歸。投林鳥聚。煙冷秋屏。孤雲漸沈雁影。尙殘簫倦鼓。別游人。官柳棲鴉未穩。露梢已挂疎星。重城。禁鼓催更。羅袖怯。暮寒輕。想綺疏空掩。鸞綃翳錦。魚鑰收銀。蘭燈伴人夜語。怕香銷漏永。著溫存。猶憶回廊待月。畫欄倚徧桐陰。

柳浪聞鶯

晴空搖翠浪。晝禽靜。霽煙收。聽暗柳啼鶯。新簧弄巧。如度秦謳。誰鈿翠絲萬縷。颺金梭。宛轉織芳愁。風裊餘音甚處。絮花三月。官溝。扁

舟。纜繫輕柔。沙路遠。倦追游。望斷橋斜日。蠻腰競舞。蘇小牆頭。偏憂。杜鵑喚去。鎮綿蠻。竟日挽春留。啼覺瓊疏午夢。翠丸驚度東西樓。

### 三潭印月

游船人散後。正蟾影。印寒秋。看冷心皎眠。清宜兔浴。皓彩輕浮。扁舟。泛天鏡裏。溯流光。澄碧浸明眸。栖鷺空驚碧草。素鱗遠避金鉤。臨流。萬象涵秋。懷渺渺。水悠悠。念漢臯遺珮。湘波步襪。空想仙游。風收。翠奩乍啓。度飛星。倒影入芳洲。瑤瑟誰彈古怨。渚宮夜舞潛虬。

### 兩峯插雲

碧尖相對處。向煙外。挹遙岑。記舞鸞啼後。天香桂子。曾去幽尋。輕陰。易晴易雨。看南峯。淡日北峯雲。雙塔秋擎。露冷。亂鐘曉送霜清。登臨。望眼增明。沙路白。海門青。正地幽天迥。水鳴山籟。風奏松琴。虛楹。半空聚遠。倚闌干。暮色與雲平。明月千巖夜午。朔風跨鶴吹笙。

(此處原缺四十二行計七百一十四字)

商。西風只在垂楊外。

浪淘沙

新雨洗晴空。碧淺眉峯。翠樓西畔畫橋東。柳線嫩黃纔半染。眼眼東風。繡戶掩芙蓉。帳減香筒。遠煙輕靄弄春容。雁雁又歸鶯未到。誰寄愁紅。

浣溪沙

幾點紅香入玉壺。幾枝紅影上金鋪。晝長人困鬪擘蒲。花徑日遲蜂課蜜。杏梁風軟燕調雛。茶蘼開了有春無。

浣溪沙

波影搖花碎錦鋪。竹風清泛玉扶疎。畫屏紋枕小紗櫺。合色麝囊  
分翠繡。夾羅螢扇縷金書。十分涼意淡妝梳。

浣溪沙

淺色初裁試暖衣。畫簾斜日看花飛。柳搖蛾綠妒春眉。象局懶拈  
雙陸子。寶弦愁按十三徽。試憑新燕問歸期。

東風第一枝 早春賦

草夢初回。柳眠未起。新陰纔試花訊。雛鴛迎曉。偎香小蝶舞晴弄影。  
飛梭庭院。早已覺日遲人靜。畫簾輕不隔春寒。旋減酒紅香暈。嗔  
欲就遠煙催暝。人欲醉晚風吹醒。瘦肌羞怯金寬。笑靨暖融粉心。珠  
歌緩引。更巧試杏妝梅鬢。怕等閑虛度芳期。老卻翠嬌紅嫩。

楚宮春 爲落花度無射宮

香迎曉白。看煙珮霞綃。弄妝金谷。倦倚畫欄無語。情深嬌足。雲擁瑤

房翠暖。繡帳捲東風。傾國半捻愁紅。念舊游。凝竚蘭翹。瑞鸞低舞。庭綠。猶想沈香亭北。人醉裏芳筆。曾題新曲。自剪露痕。移取春歸華屋。絲障銀屏靜掩。倘未許鶯窺蝶宿。蜂蠟良宵。酒半闌。重繞鴛機。醉鬢爭妍紅玉。

大聖樂 東園餞春。卽席分題。

嬌綠迷雲。倦紅顰曉。嫩晴芳樹。漸午陰簾影移香。燕語夢回。千點碧桃吹雨。冷落錦官人歸後。記前度蘭橈停翠浦。凭欄久。謾凝想鳳翹。慵聽金縷。留春問誰最苦。奈花自無言。鶯自語。對畫樓殘照。東風吹遠。天涯何許。怕折露條愁輕別。更煙暝長亭啼杜宇。垂楊晚。但羅袖暗霏飛絮。單

三犯渡江雲

丁卯歲未除三日。乘興棹雪。訪李商隱。周隱於餘不之濱。

主人喜余至。擁裘曳杖。相從於山巔。水涯松雲竹雪之間。酒酣促膝笑語。盡出笈中畫。囊中詩。以娛客。醉歸船窗。統然夜鼓半矣。歸途再雪。萬山玉立相映發。冰鏡晃耀。照人毛髮。灑灑清入肝鬲。凜然不自支。疑行清虛府中。奇絕境也。竭來故山。恍然隔歲。慨然懷思。何異神游夢適。因竊自念。人間世不乏清景。往往汨汨塵事。不暇領會。抑亦造物者。故爲是靳靳乎。不然。戴溪之雪。赤壁之月。非有至高難行之舉。何千載之下。寥寥無繼之者耶。因賦此解。以寄余懷。

冰谿空翠晚。滄茫雁影。淺水落寒沙。那回乘夜興。雲雪孤舟。曾訪故人家。千林未綠。芳信暖。玉照霜華。共凭高聯詩喚酒。暝色奪昏鴉。堪嗟。嘶鳴玉珮。山護雲衣。又扁舟東下。想故園天寒倚竹。袖薄籠紗。

詩筒已是經年別。早暖律春動香葭。愁寄遠。溪邊自折梅花。

露華 次張宙雲韻

暖銷蕙雪。漸水紋漾錦。雲淡波溶。岸香弄藥。新枝輕裊條風。次第燕  
歸將近。愛柳眉挑。鬢煙濃。鴛徑小。芳屏聚蝶。翠渚飄鴻。六橋舊情  
如夢。記扇底官眉。花下游驄。選歌試舞。連宵戀醉珍叢。怕裏早鶯啼  
醒。問杏鈿誰點愁紅。心事悄。春嬌又入翠峯。

桃源憶故人

流蘇靜掩羅屏小。春夢苦無分曉。一縷舊情誰表。暗逐餘香裊。春  
思謾寄流紅杏。人瘦花枝多少。郎馬未歸春老。空怨王孫草。相

糖多令

絲雨織鶯梭。浮錢點細荷。燕風輕。庭宇正清和。苔面唾茸堆繡徑。春  
去也。奈春何。官柳老青蛾。題紅隔翠波。扇鸞孤。塵暗合歡羅。門外

綠陰深似海。應未比。舊愁多。

西江月

波影暖浮玉鬢。柳陰深鎖金鋪。湘桃花褪燕調雛。又是一番春暮。  
碧柱情深鳳怨。雲屏夢淺鶯呼。繡窗人倦冷熏爐。簾影搖花亭午。

菩薩蠻

霜風漸入龍香被。夜寒微澀官壺水。滴滴是愁聲。聲聲滴到明。夢  
魂隨雁去。飛到顰眉處。雁已過西樓。又還和夢愁。

繡鸞鳳花犯 賦水仙

楚江湄。湘娥乍見。無言灑清淚。澹然春意。空獨倚東風。芳思誰寄。凌  
波路冷秋無際。香雲隨步起。謾記得漢宮仙掌。亭亭明月底。冰絃  
寫怨更多情。騷人恨。枉賦芳蘭幽芷。春思遠。誰歎賞。國香風味。相將  
共歲寒伴侶。小窗淨。沈煙熏翠袂。幽夢覺。娟娟清露。一枝燈影裏。



探春慢 脩門度歲和友人韻。

綵勝宜春。翠盤消夜。客裏暗驚時候。翦燕心情。呼盧笑話。景物總成懷舊。愁鬢如垂楊。怪穉眼漸濃如豆。儘教寬盡春衫。畢竟爲誰消瘦。梅浪半空如繡。便筦領芳菲。忍辜詩酒。映燭占花。臨窗卜鏡。還念嫩寒官袖。簫鼓動春城。競點綴玉梅金柳。厮勾元宵。燈前共誰攜手。

瑤花慢

后土之花。天下無二本。方其初開。帥臣以金瓶飛騎。進之天上。間亦分致貴邸。余客輦下。有以一枝

(此處原缺十八行計二百零六字)

長安獨客。又見西風。素月丹楓。淒然其爲秋也。因調夾鍾

羽一解。

煙水闊。高林弄殘照。晚蠲淒切。碧礎度韻。銀牀飄葉。衣溼桐陰露冷。  
採涼花時賦秋雪。歎輕別。一襟幽事。砌蛩能說。客思嗙商還怯。怨  
歌長瓊壺暗缺。翠扇恩疎。紅衣香褪。繾成銷歇。玉骨西風。恨最恨閑  
卻新涼時節。楚簫咽。誰倚西樓淡月。

鷓鴣天

燕子時時度翠簾。柳寒猶未褪香綿。落花門巷家家雨。新火樓臺處  
處煙。情默默。恨厭厭。東風吹動畫秋千。拆桐開盡鶯聲老。無奈春  
何祇醉眠。

夜行船

蠶老無聲深夜靜。新霜粲一簾燈影。妒夢鴛高。烘愁月淺。縈亂恨。絲  
難整。笙字嬌訛誰爲詭。香襟冷怕看粧印。繡閣藏春。海棠偷暖。還

似去年風景。

采綠吟

甲子夏。霞翁會吟社諸友。逃暑於西湖之環碧。琴樽筆硯。短葛練巾。放舟於荷深柳密間。舞影歌塵。遠謝耳目。酒酣。采蓮葉探題賦詞。余得塞垣春。翁爲翻譜數字。短簫按之。音極諧婉。因易今名云。

采綠鴛鴦浦。畫舸水北雲西。槐薰入扇。柳陰浮漿。花露侵詩。點塵飛不到。冰壺裏。紺霞淺壓玻璃。想明璫。波波遠。依依心事寄誰。移棹樣空明。蘋風度瓊絲。霜筦清脆。只赤挹幽薺。悵岸隔紅衣。對滄洲心與漚閒。吟情渺蓮葉共分題。停杯久。涼月漸生。煙合翠微。

解語花

羽調解語花。音韻婉麗。有譜而亡其辭。連日春晴。風景韶

媚。芳思撩人。醉撚花枝。倚聲成句。

晴絲罥蝶。暖蜜酣蜂。重簾捲春寂寂。雨萼煙梢。壓闌干花雨染衣紅溼。金鞍誤約。空極目天涯草色。閨苑玉簫人去後。惟有鶯知得。餘寒猶掩翠戶。梁燕乍歸。芳信未端的。淺薄東風。莫因循輕把杏鈿狼籍。塵侵錦瑟。殘日綠窗春夢窄。睡起折花無意緒。斜倚秋千立。

### 曲游春

禁煙湖上薄游。施中山賦詞甚佳。余因次其韻。蓋平時游舫。至午後則盡入裏湖。抵暮始出斷橋。小駐而歸。非習于游者不知也。故中山極擊節余閒卻半湖春色之句。謂能道人之所未云。

禁苑東風外。颺暖絲晴絮。春思如織。燕約鶯期。惱芳情偏在翠深紅隙。漠漠香塵隔。佛十里亂弦叢笛。看畫船。盡入西泠。閒卻半湖春色。

柳陌新煙凝碧。映簾底官眉。堤上游勒。輕暝籠寒。怕梨雲夢冷。杏香愁冪。歌筵疇寒食。奈蝶怨。良宵岑寂。正滿湖碎月搖花。怎生去得。

大聖樂 次施中山蒲節韻

虹雨霽風。翠縈蘋渚。錦翻葵徑。正小亭曲沼幽深。簟枕夢回。苔色槐陰清潤。暗憶蘭湯初洗玉。襯碧霧籠綃垂蕙領。輕妝了。裊涼花絳縷。香滿鸞鏡。人間午遲漏永。看雙燕將雛穿藻井。喜玉壺無暑。涼涵荷氣。波搖簾影。畫舸西湖渾如舊。又菰冷蒲香驚夢醒。歸舟晚。聽誰家紫簫聲近。

桂枝香 雲洞賦桂

巖扉逗綠。又涼入小山。千樹幽馥。仙影懸霜粲夜。楚宮六六。明霞洞窄珊瑚冷。對清商吟思堪掬。麝痕微沁。蜂黃淺約。數枝秋足。別有雕欄翠屋。任滿帽珠塵。拚醉香玉。瘦倚西風。誰見露侵肌粟。好秋能

幾花前笑。繞涼雲重喚銀燭。寶屏空曉。珍叢怨月。夢回金谷。

杏花天 賦莫愁

瑞雲盤翠侵妝額。眉柳嫩不禁愁積。返魂誰染東風筆。寫出郢中春色。人去後垂楊自碧。歌舞夢欲尋無跡。愁隨兩槳江南北。日暮石城風急。

杏花天 賦昭君

漢宮乍出慵梳掠。關月冷玉沙飛幕。龍香撥重春葱弱。一曲哀弦謾託。君恩厚空憐命薄。青冢遠幾番花落。丹青自是難描摸。不是當時畫錯。

南樓令 次陳君衡韻

桂影滿空庭。秋更廿五聲。一聲聲都是銷凝。新雁舊蛩相應和。禁不過。冷清清。酒與夢俱醒。病因愁做成。展紅綃猶有餘馨。暗想芙蓉

城下路。花可。霧冥冥。

南樓令 又次君衡韻

欹枕聽西風。葢階月正中。弄秋聲金井孤桐。聞省十年吳下路。船幾度。繫江楓。輦路又迎逢。秋如歸興濃。歎淹留還見新冬。湖外霜林秋似錦。一片片。認題紅。

秋霽

乙丑秋晚。同盟載酒。爲水月游。商令初肅。霜風戒寒。撫人事之飄零。感歲華之搖落。不能不以此興懷也。酒闌日暮。愜然成章。

重到西泠。記芳園載酒。畫船橫笛。水曲夫容。渚邊漚鷺。依依似曾相識。年芳易失。斷橋幾換。垂楊色。謾自惜。愁損庾郎。霜點鬢華白。殘  
葢露草。怨蝶寒花。轉眼西風。又成陳迹。歎如今才消量減。樽前孤負

醉吟筆。欲寄遠情秋水隔。舊游空在。凭高望極斜陽。亂山浮紫。暮雲凝碧。

齊天樂

紫霞翁閑譙梅邊。謂客曰。梅之初綻。則輕紅未銷。已放則一白呈露。古今誇賞。不出香白。顧未及此。欠事也。施中山賦之。余和之。

官簷融暖晨妝嬾。輕霞未勻酥臉。倚竹嬌顰。臨流瘦影。依約樽前重見。盈盈笑靨。映珠絡玲瓏。翠綃葱蒨。夢入羅浮。滿衣清露暗香染。東風千樹易老。怕紅顏旋減。芳意偷變。贈遠天寒。吟香夜永。多少江南新怨。瓊疏靜掩。任翦雪裁雲。競誇輕豔。畫角黃昏。夢隨春共遠。

憶舊游 落梅賦

念芳鈿委路。粉浪翻空。誰補春痕。竚立傷心事。記官簷點鬢。候館霏



襟。東君護香情薄。不繞徑雲深。嘆金谷樓危。避風臺淺。消瘦飛瓊。  
梨雲已成夢。謾蝶恨淒涼。人怨黃昏。撚殘枝重嗅。似徐娘雖老。猶有  
風情。不禁許多芳思。青子漸成陰。怕酒醒歌闌。空庭夜月。羌筦清。

一枝春

寄閒飲客。春窗促座。款密酒酣意洽。命清吭。歌新製。余因  
爲之霑醉。且調新弄以謝之。

碧澹春姿。柳眠醒似怯。朝來酥雨。芳程乍數。喚起探花情緒。東風尙  
淺。甚先有翠嬌紅嫵。應自把羅綺圍春。占得畫屏春聚。留連繡叢  
深處。愛歌雲裊裊。低隨香縷。瓊窗夜暖。試與細評新譜。妝梅媚晚。料  
無那弄顰佯妒。還怕裏簾外。籠鶯笑人醉語。

一枝春

越一日。寄閒次余前韻。且未能忘情於落花飛絮間。因寓

去燕楊姓事以寄意。此少游小樓連苑之詞也。余遂戲用張氏故實。次韻代答。亦東坡錦里先生之詩乎。

簾影移陰。杏蕪寒乍溼。西園絲雨。芳期暗數。又是去年心緒。金花謾  
翦。倩誰畫舊時眉嫵。空自想楊柳風流。淚滴軟綃紅聚。羅窗那回  
歌處。嘆庭花倦舞。香銷衣縷。樓空燕冷。碎錦懶尋塵譜。幺弦謾賦。記  
曾是倚嬌成妒。深院悄。閒掩梨花。倩鶯寄語。

點絳脣

雪霽寒輕。興來載酒移吟艇。玉田千頃。橋外詩情迥。重到孤山。往  
事和愁醒。東風緊。水邊疎影。誰念梅花冷。

戀繡衾 賦蝶

粉黃衣薄。霑麝塵。作南華春夢乍醒。活計一生花裏。恨曉房香露正  
深。芳蹊有恨。時時見。趁游絲高下弄晴。生怕被春歸了。趕飛紅穿

度柳陰。

江城子 賦玉盤盂芍藥寄意

玉肌多病怯殘春。瘦稜稜。睡騰騰。清楚衣裳。不受一塵侵。香冷翠屏  
春意靚。明月淡。曉風輕。樓中燕子夢中雲。似多情。似無情。酒醒歌  
闌。誰爲喚眞眞。盡日瑣窗人不到。鶯意懶。蝶愁深。

綠蓋舞風輕 白蓮賦

玉立照新妝。翠蓋亭亭。淩波步秋綺。眞色生香。明璫搖淡月。舞袖斜  
倚。耿耿芳心。奈千縷情絲繫。恨開遲。不嫁東風。顰怨嬌藥。花底。  
謾卜幽期。素手採珠房。粉艷初褪。雨溼鉛腮。碧雲深暗聚。軟銷清淚。  
訪藕尋蓮。楚江遠相思誰寄。棹歌回。衣露滿身花氣。

玲瓏四犯 戲調夢窗

波暖塵香。正嫩日輕陰。搖蕩清晝。幾日新晴。初展綺杼紋繡。年少忍

負韶華。儘占斷豔歌芳酒。看翠簾蝶舞蜂喧。催趁禁煙時候。杏腮紅透。梅鈿皺。燕將歸海棠。斲勾。尋芳較晚。東風約。還在劉郎後。憑問柳陌舊鶯。人比似垂楊。誰瘦。倚畫闌無語。春恨遠。頻回首。

謁金門

花不定。燕尾翦開紅影。幾點露香蜂趕趁。日遲簾幙靜。試把翠蛾輕暈。愁滿寶臺鸞鏡。倒指一春將次盡。歸期猶未穩。

眼兒媚

飛絲半溼惹歸雲。愁裏又聞鶯。淡月秋千。落花庭院。幾度黃昏。十年一夢揚州路。空有少年心。不分不曉。厭厭默默。一段傷春。

拜星月慢

癸亥春。沿檄荆谿。朱墨日賓送。忽忽不知芳事。落鶻聲草色間。郡僚間載酒相慰。薦長歌清醕。政爾供愁。客夢栩栩。

已蜚度四橋煙水外矣。醉餘短弄。歸日。將大書之垂虹。

鳳葉陰清。孤花香冷。迤邐芳洲春換。薄酒孤吟。悵相如游倦。想人在  
絮幙香簾凝望。誤認幾許煙牆風幔。芳草天涯。負華堂雙燕。記簫  
聲淡月梨花院。研牋紅謾寫東風怨。一夜落月啼鶻。喚四橋吟纜。蕩  
歸心已過江南岸。清宵夢遠。逐飛花亂。幾千萬縷垂楊。翦春愁不斷。

好事近

秋水浸芙蓉。清曉綺窗臨鏡。柳弱不勝愁重。染蘭膏微沁。下階笑  
折紫玫瑰。蜂蝶撲雲鬢。回首見郎羞走。罨繡裙微褪。

蘋洲漁笛譜卷二

長亭怨慢

歲丙午丁未。先君子監州太末。時刺史楊泳齋、員外別駕  
牟存齋、西安令翁浩堂、郡博士洪恕齋、一時名流星聚。見  
爲奇事。倅居據龜阜。下瞰萬室。外環四山。先子作堂曰嘯  
詠。撮登覽要。蜿蜒入後圃。梅清竹癯。虧蔽風月。後俯官河。  
相望一水。則小蓬萊在焉。老柳高荷。吹涼竟日。諸公載酒  
論文。清彈豪吹。筆研琴樽之樂。蓋無虛日也。余時甚少。執  
杖屨。供洒掃。諸老緒論殷殷。金石聲猶在耳。後十年過之。  
則徑草池萍。憮然葵麥之感。一時交從。水逝雲飛。無人識  
令威矣。徘徊水竹間。悵然久之。因譜白石自製調。以寄前  
度劉郎之懷云。

記千竹萬荷深處。綠淨池臺。翠涼亭宇。醉墨題香。閒簫橫玉。盡吟趣。勝流星聚。知幾誦燕臺句。零落碧雲空。嘆轉眼歲華如許。凝竚。望涓涓一水。夢到隔花窗戶。十年舊事。儘消得庾郎愁賦。燕樓鶴表半漂零。算惟有盟漚堪語。謾倚徧河橋。一片涼雲吹雨。

齊天樂

余自入冬多病。吟事盡廢。小窗淡月。忽對橫枝。恍然空谷之見似人也。泚筆賦情。不復作少年丹白想。或者以九方臯求我。則庶幾焉。

東風又入江南岸。年年漢宮春早。寶曆無痕。生香有韻。消得何郎花惱。孤山夢繞。記路隔金沙。那回曾到。夜月相思。翠樽誰共飲清醪。天寒空念贈遠。水邊憑爲問。春到多少。竹外凝情。牆陰照影。誰見嫣然一笑。吟薌未了。怕玉筍西樓。一聲霜曉。花自多情。看花人自老。

月邊嬌 元夕懷舊

酥雨烘晴。蚤柳盼顰嬌。蘭芽愁醒。九街月淡。千門夜暖。十里寶光花影。塵凝步襪。送豔笑爭誇輕俊。笙簫迎曉。翠幕捲天香官粉。少年紫曲疎狂。絮花縱蹟。夜蛾心性。戲叢圍錦。燈簾轉玉。拚卻舞勾歌引。前歡謾省。又輦路東風吹鬢。醺醺倚醉。任夜深春冷。紫曲疑韋曲。

宴清都 登雪川圖有賦

老去閒情嬾。東風外、萋萋花絮零亂。輕漚漲綠。啼鶻暗碧。一春過半。尋芳已是來遲。怕迤邐、華年暗換。應悵恨、白雪歌空。秋霜鬢冷誰筦。憑闌自笑清狂。事隨花謝。愁與春遠。持杯顧曲。登樓賦筆。杜郎才減。前歡已隔殘照。但耿耿、臨高望眼。遡流紅、一棹歸時。半蟾弄晚。

梅花引 次韻貧房賦落梅

瑤妃鸞影逗仙雲。玉成痕。麝成塵。露冷鮫房。清淚霰珠零。步繞羅浮



歸路遠。楚江晚。賦官斜。招斷魂。酒醒夢醒惹新恨。褪素妝。愁浣粉。  
翠禽夜冷舞香惱。何遜多情。委珮殘鈿。空想墜樓人。欲挽湘裙無處  
覓。倩誰爲。寄江南。萬里春。

瑞鶴仙

寄閒結唼臺。出花柳半空閒。遠迎雙塔。下瞰六橋。標之曰  
湖山繪幅。霞翁領客落成之。初筵。翁俾余賦詞。主賓皆賞  
音。酒方行。寄閒出家姬侑樽。所歌則余所賦也。調閒婉而  
辭甚習。若素能之者。坐客驚詫敏妙。爲之盡醉。越日過之。  
則已大書刻之危棟間矣。

翠屏圍畫錦。正柳織煙綃。花明春鏡。層欄幾回凭。看六橋鶯曉。兩堤  
鷗暝。晴嵐隱隱。映金碧樓臺遠近。謾曾誇萬幅丹青。畫筆畫應難盡。  
那更波涵月彩。露裊蓮妝。水描梅影。調朱弄粉。憑誰寫。四時景。問

玉匳西子。山眉波盼。多少濃施淺暈。算何如付與吟翁。緩評細品。

倚風嬌近 填霞翁譜。賦大花。

雲葉千重。麝塵輕染金縷。弄嬌風軟。霞綃舞。花國選傾城。暖玉倚銀屏。綽約娉婷。淺素宮黃爭嫵。生怕春知。金屋藏嬌深處。蜂蝶尋芳無據。醉眼迷花映紅霧。修花譜。翠毫夜溼。天香露。

英臺近

燭搖花。香裊穗。猶自奈春冷。過了收燈。纔始作花信。無端雨外餘醒。鶯邊殘夢。又還動惜芳心性。忍重省。幾多綠意紅情。吟牋倩誰整。香減春衫。老卻舊荀令。小樓深閉。東風。曲屏斜倚。知他是爲誰成病。

浪淘沙

芳草碧茸茸。染恨無窮。一春心事雨聲中。窄索官羅寒尙悄。閒倚薰

籠。猶記粉欄東。同醉香叢。金鞍何處驟驂驄。裊裊綠窗殘夢斷。紅杏東風。

浣溪沙

不下珠簾怕燕噴。旋移芳檻引流鶯。春光卻早又中分。杏火無煙然綠暗。梨花如雪冷清明。冶游天氣冶游心。

浣溪沙

絲雨籠煙織晚晴。睡餘春酒未全醒。翠鈿輕脫隱香痕。生怕柳綿縈舞蝶。戲拋梅彈打啼鶯。最難消遣是殘春。

齊天樂

丁卯七月既望。余偕同志。放舟邀涼於三匯之交。遠脩太白采石。坡仙赤壁數百年故事。游興甚逸。余嘗賦詩三百言。以紀清適。座客和篇交屬。意殊快也。越明年秋。復尋前

盟於白荷涼月間。風露浩然。毛髮森爽。遂命蒼頭奴。橫小  
笛於柁尾。作悠揚杳渺之聲。使人真有乘槎飛舉想也。舉  
白盡醉。繼以浩歌。

清谿數點芙蓉雨。蘋鷗泛涼吟。洗玉空明。浮珠沆漑。人靜籟沈波  
息。仙潢只赤。想翠宇瓊樓。有人相憶。天上人間。未知今夕是何夕。  
此生此夜此景。自仙翁去後。清致誰識。散髮吟商。簪花弄水。誰伴涼  
宵橫笛。流年暗惜。怕一夕西風。井梧吹碧。底事閒愁。醉歌浮大白。

大酺 春陰懷舊

又秣歸啼。荼蘼謝。寂寂春陰池閣。羅窗人病酒。柰牡丹初放。晚風還  
惡。燕燕歸遲。鶯鶯聲懶。閒看秋千紅索。三分春過二。尙剩寒猶凝。翠  
衣香薄。傍鷓徑鸚籠。一池萍碎。半簷花落。最憐春夢弱。楚臺遠。空  
負朝雲約。謾念想清歌錦瑟。翠筵瑤樽。幾回沈醉東園酌。燕麥菟葵

恨。倩誰訪畫欄紅藥。況多病腰如削。相如老去。賦筆吟牋閒卻。此情怕人問著。

霓裳中序第一 次篔房韻

湘屏展翠疊。恨入宮溝流怨葉。缸冷金花暗結。又雁影帶霜。蛩音淒月。珠寬腕雪。嘆錦牋芳字盈篋。人何在玉簫舊約。忍對素娥說。愁切。夜碓幽咽。任帳底沈煙漸滅。紅蘭誰采贈別。洛汜分綃。漢浦遺玦。舞鸞光半缺。最怕聽離弦乍闕。凭闌久一庭香露。桂影弄接蝶。

過秦樓 避暑。次笛雲韻。

紺玉波寬。碧雲亭小。冉冉水楓香細。魚牽翠帶。燕掠紅衣。雨急萬荷喧睡。臨檻自采瑤房。鉛粉霏襟。雪絲縈指。喜嘶蟬樹遠。盟漚鄉近。鏡奩光裏。簾戶悄竹色侵棋。槐陰移漏。晝永篔房鋪水。清眠乍足。晚浴初慵。瘦約楚裙尺二。曲砌虛庭。夜深月透。龜紗涼生。蟬翅看銀潢。

瀉露金井啼鴉漸起。

聲聲慢

逃禪作梅、瑞香、水仙。字之曰三香。

瑤臺月冷。珮渚煙深。相逢共話淒涼。曳雪牽雲。一般淡雅梳妝。樊姬  
歲寒舊約。喜玉兒不負蕭郎。臨水鏡。看清鉛素靨。眞態生香。長記  
湘臯春曉。仙路迴冰鈿翠帶交相。滿引臺杯。休待怨箋吟商。凌波又  
歸甚處。問蘭昌何似唐昌。春夢好。倩東風留駐瑣窗。

聲聲慢

逃禪作菊、桂、秋荷。目之曰三逸。

妝額黃輕。舞衣紅淺。西風又到人間。小雨新霜。萍池蘚徑生寒。輸他  
漢宮姊妹。燦星鈿霞珮珊珊。涼意早。正金盤露潔。翠蓋香殘。三十  
六宮秋好。看扶疎仙影。伴月長閒。寶絡風流。何如細藥堪餐。幽香未

應便減。傲清霜。正自宜看。吟思遠。賦東籬。還賦小山。

風入松 立春日。卽席次寄閒韻。

柳梢煙軟已瓊瓏。嬌眼試東風。情絲又逐青絲亂。剩寒輕。猶戀芳權。  
筍玉新裁。早燕。杏鈿時引晴蜂。當時蘭柱繫花驄。人在小樓東。鶯  
嬌戲索迎春句。愛露牋。新染香紅。未信閒情便懶。探花拚醉瓊鍾。

浪淘沙

柳色淡如秋。蝶懶鶯羞。十分春事九分休。開盡楝花寒尚在。怕上簾  
鉤。京洛少年游。誰念淹留。東風吹雨過西樓。殘夢宿醒相合就。一  
段新愁。

鷓鴣天

相傍清明晴便慳。閉門空自惜花殘。海棠半坼難禁雨。燕子初歸不  
耐寒。金鴨冷。錦鴛閒。銀缸空照小屏山。翠羅袖薄東風峭。獨倚西

樓第幾欄。

夜行船

寒菊欹風。棲小蝶。簾櫳靜。半規涼月。夢不分明。恨無憑據。腸斷錦牋盈篋。哀角吹霜寒正怯。倚瑤箏。暗愁誰說。寶獸頻添。玉蟲時翦。長記舊家時節。

齊天樂

曲屏遮斷行雲夢。西樓怕聽疎雨。硯凍凝華。香寒散霧。呵筆慵題新句。長安倦旅。歎衣染塵痕。鏡添秋縷。過盡飛鴻。錦牋誰爲寄愁去。簫臺應是怨別。曉寒梳洗懶。依舊眉嫵。酒滴爐香。花圍座暖。閒卻珠韞鈿柱。芳心謾語。悵柳外游韉。繫情何許。暗卜歸期。細將梅蕊數。

滿庭芳 賦湘梅

玉心脣脂。香迷眼纈。肉紅初映仙裳。湘臯春冷。誰翦茜雲香。疑是潘



妃乍起。霞侵臉。微印宮妝。還疑是。壽陽凝醉。無語倚含章。絳綃清  
淚冷。東風寄遠。愁損紅娘。笑李凡桃俗。蝶喜蜂忙。莫把杏花輕比。怕  
杏花不敢承當。飄零處。還隨流水。應去誤劉郎。

清平樂 次宿雲韻

吹梅聲咽。簾捲初弦月。一寸春霏銷蕙雪。愁染垂楊帶結。畫橋平  
接金沙。軟紅淺隔兒家。燕子未歸門掩。晚妝空對菱花。

清平樂 再次前韻

晚鶯嬌咽。庭戶溶溶月。一樹湘桃飛茜雪。紅豆相思漸結。看看芳  
草平沙。游韉猶未歸家。自是蕭郎飄蕩。錯教人恨楊花。

乳燕飛

辛未首夏。以書舫載客游蘇灣。徙倚危亭。極登覽之趣。所  
謂浮玉山。碧浪湖者。皆橫陳於前。特吾几席中一物耳。遙

望具區。渺如煙雲。洞庭縹緲諸峯。轟轟獻狀。蓋王右丞李  
將軍著色畫也。松風怒號。暝色四起。使人浩然忘歸。慨然  
懷古。高歌舉白。不知身世爲何如也。溪山不老。臨賞無窮。  
後之視今。當有契余言者。因大書山楹。以紀來遊。

波影搖漣。趁薰風一舸來時。翠陰清晝。去郭軒楹。纔數里。薛磴松  
關雲岫。快展齒筇。枝先後。空半危亭。堪聚遠。看洞庭縹緲。爭奇秀。人  
自老。景如舊。來颿去棹。還知否。問古今幾度斜陽。幾番回首。晚色  
一川誰繞。領都付。雨荷煙柳。知我者。燕朋鷗友。笑拍闌干。呼范蠡。甚  
平吳卻倩垂綸手。吁萬古。付卮酒。

掃花游 用清真韻

柳花颺白。又火冷錫香。歲時荆楚。海棠似語。惜芳情燕掠。錦屏紅舞。  
怕裏流芳暗水。啼煙細雨。帶愁去。歎寂寞東園。空想游處。幽夢曾

暗許。奈草色迷雲。送春無路。翠丸薦俎。掩清樽。謾憶舞蠻歌素。怨碧飄香。料得啼鶉更苦。正愁竚。黯春陰。倦簫殘鼓。

龍吟曲 賦寶山園表裏畫圖

仙山非霧非煙。翠微縹緲樓臺亞。江蕪海樹。晴光雨色。天開圖畫。兩岸潮平。六橋煙霽。晚鉤簾挂。自元暉去後。雲情雪意。丹青手應難寫。花底朝回多暇。倚高寒有人蕭灑。東山杖屨。西州賓客。笑譚風雅。貯月杯寬。護香屏暖。好天良夜。樂閒中日月。清時鐘鼓。結春風社。

風入松 爲謝省齋賦林壑清趣。

枇杷花老洞雲深。流水泠泠。藍田誰種玲瓏玉。土華寒暈碧雲根。佳興秋英春草。好音夜鶴朝禽。閒聽天籟靜看雲。心境俱清。好風不負幽人意。送良宵一枕松聲。四友江湖泉石。二井鐘鼎山林。

鳳棲梧 賦生香亭

竹窈花深連別墅。曲曲回廊。小小閒庭宇。忽地香來無覓處。杖藜閒趁游蜂去。老桂懸秋森玉樹。澗底孤芳。萼萼吹詩句。一掬幽情知幾許。鉤簾半畝藤花雨。

少年游 賦涇雲軒

松風蘭露滴厓陰。瑤草入簾青。玉鳳驚飛。翠蛟時舞。噴薄濺春雲。

冰壺不受人間暑。幽碧呀珍禽。花外琴臺。竹邊棋墅。處處是閒情。

西江月 醱醺閣春賦

花氣半侵雲閣。柳陰近隔春城。畫闌明月按瑤箏。醉倚滿身芳影。

翠格素虬晴雪。錦籠紫鳳香雲。東風吹玉滿閒庭。二十四簾春靚。

清平樂 橫玉亭秋倚

詩情畫意。只在闌干外。雨露天低生爽氣。一片吳山越水。官煙醉

柳春晴。海風洗月秋明。喚取九霞飛珮。夜涼跨鶴吹笙。

朝中措 東山碁墅

桐陰蔽影小闌干。晝永瑣窗閒。當日清譚賭墅。風流猶記東山。犀  
奩象局。驚回槐夢。飛翫生寒。自有仙機活著。未應袖手旁觀。

聞鵲喜 吳山觀濤

天水碧。染就一江秋色。鼇戴雪山籠起。蟄快風吹海立。數點煙鬟  
青滴。一杼霞銷紅溼。白鳥明邊。颯影直。隔江聞夜笛。

浣溪沙 題紫清道院

竹色苔香小院深。蒲團茶鼎掩山扃。松風吹淨世間塵。靜養金芽  
文武火。時調玉軫短長清。石牀閒臥看秋雲。長清。短清。皆琴曲名。

吳山青 賦無心處茅亭

山青青。水泠泠。養得風煙數畝成。乾坤一草亭。雲無心。竹無心。我  
亦無心似竹雲。歲寒同此盟。

英臺近 賦攬秀園

步玲瓏。尋窈窕。瑤草四時碧。小小蓬萊。花氣透簾隙。幾回翠水荷初。  
蒼厓梅小。綺寮掩玉壺春色。柳屏窄。芳檻日日東風。幾醉幾吟筆。  
曲折花房。鶯燕似相識。最憐燈影纔收。歌塵初靜。畫樓外一聲秋笛。

長相思

燈輝輝。月微微。帳暖香深春漏遲。夢回聞子規。欲成詩。未成詩。生  
怕春歸春又歸。花飛花未飛。

清平樂

小橋縈綠。密翠藏陰屋。千頃風煙森萬玉。依約輞川韋曲。臨流照  
影何人。悠然倚杖看雲。柳色翠迷山色。泉聲清和蟬聲。

清平樂 杜陵春游圖

錦城春曉。苑陌芳菲早。可是杜陵人未老。日日酒迷花惱。歸驪困

倚芳醒。醒來還有新吟。人與杏花俱醉。春風一路聞鶯。

清平樂 三白圖

靜香眞色。花與人爭白。屬玉雙飛煙月夕。點破一匳秋碧。翠羅袖薄天寒。笛聲何處關山。手撚一枝春色。東風怨入江南。

柳梢青

余生平愛梅。僅一再見。逃禪眞蹟。癸酉冬。會疎清翁孤山下。出所藏雙清圖。奇悟入神。絕去筆墨畦徑。卷尾補之自書柳梢青四詞。辭語清麗。翰札遒勁。欣然有契於心。余因戲云。不知點胸老放鶴翁。同生一時。其清風雅韻優劣。當何如哉。翁矇曰。我知畫而已。安與許事。君其問諸水濱。因次韻。載名於後。庶異時開卷索笑。不爲生客云。

約略春痕。吹香新句。照影清尊。洗盡時妝。效顰西子。不負東昏。金

沙舊事休論。儘消得東風返魂。一段真清。風前孤驛。雪後前村。

柳梢青

萬雪千霜。禁持不過。玉雪生光。水部情多。杜郎老去。空惱愁腸。天  
寒野曠。空廊。靜倚竹無人自香。一笑相逢。江南江北。竹屋山窗。

柳梢青

映水穿籬。新霜微月。小藥疎枝。幾許風流。一聲龍竹。半幅鵝溪。江  
頭悵望多時。欲待折相思寄伊。眞色眞香。丹青難寫。今古無詩。

柳梢青

夜鶴驚飛。香浮翠蘚。玉點冰枝。古意高風。幽人空谷。靜女深幃。芳  
心自有天知。任醉舞花邊帽欹。最愛孤山。雪初晴後。月未殘時。

南樓令 次陳君衡韻

開了木芙蓉。一年秋已空。送新愁千里孤鴻。搖落江蘿多少恨。吟不



盡。楚雲峯。往事夕陽紅。故人江水東。翠衾寒幾夜霜濃。夢隔屏山飛不去。隨夜鵲。繞疎桐。

南樓令 歲次趙元父韻

好夢不分明。楚雲千萬層。帶圍寬。愁損蘭成。玉杵玄霜纔只赤。青羽信。便沈沈。水調夜樓清。清宵誰共聽。砑牋紅。空賦傾城。幾度欲吟吟不就。可憐是。沒心情。

聲聲慢 九日。松澗席。

橙香小院。桂冷閒庭。西風雁影涵秋。鳳撥龍槽。新聲小按梁州。鶯吭夜深轉巧。凝涼雲。應爲歌留。慵顧曲。歎周郎老去。鬢改花羞。何事登臨感慨。倩金蕉一洗。千古清愁。屢舞高歌。作成陶謝風流。人生最難一笑。拚樽前醉倒方休。待醉也。帶黃花。須帶滿頭。

明月引

趙白雲初賦此詞。以爲自度腔。其實卽梅花引也。陳君衡  
劉養源皆再和之。會余有西州之恨。因用韻以寫幽懷。

舞紅愁碧晚蕭蕭。遡回潮。苧仙橈。風露高寒。蜚下紫霞簫。一雁遠將  
千萬恨。懷渺渺。翦愁雲。風外飄。酒醒未醒香旋銷。采江蘺。吟楚招。  
清徽芳筆梅魂冷。月影空描。錦瑟瑤樽。閒度可憐宵。二十四欄愁倚  
徧。空悵望。短長亭。長短橋。

明月引

養源再賦。余亦載贖。

雁霜苔雪冷飄蕭。斷魂潮。送輕橈。翠袖珠樓。清夜夢瓊簫。江北江南  
雲自碧。人不見。淚花寒。隨雨飄。愁多病多腰素銷。倚清琴。調大招。  
江空年晚淒涼句。遠意難描。月冷花陰。心事負春宵。幾度問春春不  
語。春又到。到西湖。第幾橋。

六么令 次韻劉養源賦雪。

癡雲翦葉。簷滴夜深悄。銀城飛捷翠隴。占祥豐年報。白戰清吟未了。  
寒鵲驚枝曉。鶴迷翠表。山陰今日。醉臥何人問安道。交映虛窗淨。  
沼。不許游塵到。誰念絮帽茸裘。歎幼安今老。玉鑑脩眉未掃。白雪詞  
新草。冰蟾光皎。梅心香動。閒看春風上瓊島。

六么令 春雪再和。

迴風帶雨。凍澀漏聲悄。小窗照影虛白。幾誤鄰雞報。千樹天花綻了。  
鶴立通明曉。眼空八表。官袍帶月。醉裏應迷灞陵道。風靜瓊林翠  
沼。片片隨春到。吟驪十里新堤。怪四山青老。玉唾珠塵怕掃。句冷池  
塘草。白天寒皎。飛瓊何在。夢覓梨雲度仙島。

謁金門 次西麓韻

芳事晚。數點杏鈿香淺。惻惻輕寒風翦翦。錦屏春夢遠。  
穉柳拖煙

嬌軟。花影暗藏深院。初試輕衫并畫扇。牡丹紅未展。

好事近 次梅谿寄別韻。

輕翦楚臺雲。玉影半分秋月。一餉淒涼無語。對殘花么蝶。碧天愁雁不成書。郎意似秋葉。聞展鴛鴦綃殘譜。捲淚花雙疊。

聲聲慢 柳花詠

燕泥霑粉。魚浪吹香。芳堤十里新晴。靜惹游絲。花邊裊裊扶春。多情最憐漂泊。記章臺曾縮青青。堪愛處。是撲簾嬌軟。隨馬輕盈。長是河橋三月。做一番晴雪。惱亂詩魂。帶雨沾衣。羅襟點點離痕。休綴潘郎鬢影。怕綠窗年少人驚。捲春去。翦東風千縷碎雲。

憶舊游 次韻箕房有懷東園。

記花陰映燭。柳影飛梭。庭戶東風。綵筆爭春豔。任春迷舞袖。醉擁歌叢。畫簾靜掩芳晝。雲翦玉瓊瓏。奈恨絕冰絃。塵銷翠譜。別鳳離鴛。

鶯籠怨春遠。但翠冷閑堦。墜粉飄紅。事逐華年換。歎水流花謝。燕去樓空。繡鴛暗老。薇徑殘。夢繞雕欄。悵寶瑟無聲。愁痕沁碧。江上孤峯。

水龍吟 次陳君衡見寄韻

燕翎誰寄愁櫚。天涯望極。王孫草。新煙換柳。光風浮蕙。餘寒尙峭。倚杖看雲。翦燈聽雨。幾番詩酒。歎長安倦客。江南舊恨。飛花亂。清明後。堤上斜陽風驟。散香綿。輕霏唳袖。麴塵兩岸。紋波十里。暖蒸香透。海闊雲深。水流春遠。夢魂難勾。問鶯邊。按譜。花前覓句。解相思否。

水龍吟 次張斗南韻

舞紅輕帶愁飛。寶鸞暗憶。章臺路。唳香醉雨。吹簫門巷。飄樓院宇。立盡殘陽。眼迷晴樹。夢隨風絮。歎江潭冷落。依依舊恨。人空老。柳如許。錦瑟華年暗度。賦行雲。空題短句。情絲繫燕。么弦彈鳳。文君更苦。煙水流紅。暮山凝紫。是春歸處。悵江南。望遠。蘋花自采。寄將愁與。

甲子仲夏。借崑山葉氏舊錄本影寫。用家藏草窗詞參校。毛辰識。  
西湖十景詞。嚮缺末二首。偶閱錢塘志。中載公謹詞二首。所缺者  
恰有之。亟命兒鈔補。其餘脫落處。未識今生得見全本否也。己巳  
端午前一日。辰又識。

徵招 九日登高

江離搖落江楓冷。霜空雁程初到。萬景正悲涼。柰曲終人杳。登臨嗟  
老矣。問今古清愁多少。一夢東園。十年心事。恍然驚覺。腸斷紫  
霞深。知音遠。寂寂怨琴。淒調短髮已無多。怕西風吹帽。黃花空自好。  
問誰識對花懷抱。楚山遠。九辯難招。更晚煙殘照。

醉月 中秋對月

奩霏淨洗。喚素娥睡起。平分秋色。雁背風高。霜兔冷。露腳侵衣香濕。  
銀浦流雲。珠房迎曉。鬢影霜爭白。玉尊良夜。與誰同醉。瑤席。忍  
記倚桂分題。簪花籌酒。處處成陳跡。十二樓空環珮杳。惟有孤雲知  
得。如此江山。依然風月。月底人非昔。知音何許。淚痕空沁愁碧。

昔登霞翁之門。翁爲予言。草窗樂府妙天下。因請其所賦觀之。不  
寧惟協比律呂。而意味迥不凡。花間柳氏。真可爲輿臺矣。翁之賞

音信夫。近觀徵招醉月之作。淒涼掩抑。頓挫激昂。此時此意。猶宋玉之悼屈平也歟。一唱三歎。使人泫然增疇昔之感。因爲書之。以識予懷云。王櫛。



編主五雲王

編初成集書叢

譜 笛 漁 洲 蘋

中華民國二十五年六月初版

周

撰 者 周 密

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

